

〔箋注倭名類聚抄六香具〕本草云，木香一名蜜香，生永昌山谷，陶云，此即青木香也，永昌不復貢，今皆從外國舶上來，乃云，大秦國以療毒腫，消惡氣，有驗，今皆用合香，不入藥用，蘇敬曰，此有二種，當以崑崙來者為佳，出西胡來者不善，葉似羊蹄而長大，花如菊花，其實黃黑，所在亦有之，別本注云，葉似薯蕷而根大，花紫色，嘉祐引蜀本云，今苑中種之，花黃，苗高三四尺，葉長八九寸，皺軟而有毛，南州異物志云，青木香出天竺，是草根狀如甘草，蕭炳云，崑崙舶上來，形如枯骨者，良時珍曰，木香南番諸國皆有，一統志云，葉類絲瓜。

〔倭名類聚抄十二香名〕零陵香 南州異物志云，零陵香，土人謂為燕草。

〔箋注倭名類聚抄六香具〕按太平御覽引南越志曰，零陵香，土人謂為鸞草，其文與此全同，證類本草載開寶本草亦云，南越志名燕草，則疑此本引南越志傳寫以涉前條而誤，非源君之舊也，嘉祐引陳藏器云，薰草一名蕙草，生下溼地，按薰草即蕙根也，葉如麻兩々相對，此即零陵香也，開寶云，零陵香主惡氣，令體香，和諸香作湯丸用之，生零陵山谷，葉如羅勒，南越志名燕草，又名薰草，即香草也，山海經云，薰草麻葉，方莖，氣如薜蘿，可以止癘，即零陵香也，圖經云，常以七月中旬開花至香，今合香家及面膏澡豆諸法皆用之，按舶來零陵香，有豆葉樣麥葉樣二種，呼豆葉樣為真，有漢種移栽者，又有本邦自生者，呼麥葉樣者，即救荒本草所謂草零陵香也，今俗呼波伎久佐者，此一種耳。

〔倭名類聚抄十二香名〕都梁香 荊州記云，都梁縣有小山，山上有水清淺，其中生蘭草，俗號蘭為都梁香。

兜納香 魏略云，兜納香出大秦國。

兜末香 漢武故事云，兜末，西王母燒之，本是兜渠國所獻。

流黃香 吳時外國志云，流黃香出都昆國。

〔箋注倭名類聚抄六香具〕拾遺又云，流黃香去惡氣，似流黃而香，又云，都昆國在扶南南三千里，南州異物志云，流黃香出南海邊，諸國今中國用者從西戎來。